

永慶帝二年。命議裁減關津稅。王以畿內四鎮察巡事出權宜。又司巡始置。多爲民擾。令執政議省減。以示寬政。乃省畿內青池二巡。四鎮惟歸察巡二所。山南冷池、海陽淳美。始置處者並撤之。顯宗景興四年。免天下巡渡稅。時巡司徵收煩重。明王聞之。謂執政曰。先王之政。關市譏而不征。今兵火之後。民力寡乏。取給惟在富賈貿遷。以通有無。奈何使猾胥苛索。能無病商乎。乃命撤去各處巡司。諸橫渡直渡一皆免稅。其巡察只許鎮官差人譏察。不得索稅。惟汴山巡別在外洋。可留巡路。通遠徼。仍詳鎮官照舊例收稅。其可留巡依舊。只置一所別支並行撤去。

是年。申水兵取船筏津錢例。凡商船槎筏泊在京口河津。許各奇隊水兵取津錢。巨商船每隻古錢三十文。中船二十四文。小船及直渡古錢十八文。其橫渡及三板小船並酌。巨筏古錢二陌。中筏古錢一陌三十文。小筏古錢一陌。其分處取錢並停。

六年。復征巡渡稅。諭曰。巡渡征稅。舊有常例。邇來奉行者率多因緣滋事。以致貿易不通。因權宜寬赦。間柰豪富細民乘此逐利。爭事末技者多。專務田功者少。又有陰結奸非。偷搬禁物。這弊所當釐正。茲參體古人重本抑末之政。經議凡諸巡渡。照某處可置者。仍置嚴立條禁。擇差廉幹官奉行。俾無橫擾。其機智苟密。一皆省去。使本末較量。輕重適平。嗣後永爲常典。宜各凜遵。無容違越。

十一年。禁巡衙額外橫征。時該徵各員多置支巡。橫征額外。又有擅增物價。稽留日期。商賈頗多不便。仍令一切撤去。違者並以重論。

十九年。禁巡司諸員無得苛征。先是巡司稅例已有定額。各號增置支巡。泛行非例。王聞之。旨下飭令。每巡一正二支。不得擅增名色。要索土產。呈面坐收。歸日交更等外錢。每鎮巡察。亦只許於本鎮

卷三十一 國用誌

巡渡之稅

四三

四角各設一所。譏察禁物與異言異服之人。其商賈往來。無得假托攬擾。違者許憲司查訪糾遞。照律論行。

按有黎巡司之例。每鎮一正充入王庫。二支爲徵官寓祿。其四角則爲鎮官督同之俸稅額一定。具有成例。一年所收正巡者至四千餘。二支四角亦至一千之數。蓋所征益薄。而商賈流通。百貨販賣。積少成多。此利之所以常厚也。惟其利之所在。故額外名色。徵員每以非例要索。乃分抄旁截。重補橫征。而商賈住來始困矣。苟非上人照其弊端。而嚴於戒飭。詳於訪察。安能禁猾胥之苛擾。以通行商之貿易哉。

二十一年定日昭巡察例。許取巨筏長八十尺以下錢五陌。中筏長四十尺以下錢三陌。其餘並爲小筏。取錢二陌。船隻有重貨滿載者爲重船。許取每隻古錢一陌。雜貨少載爲輕船。許取錢每隻古錢三十文。其餘並爲空船。許每隻古錢六文。